

東
華
續
錄

東華續錄

同治三十一

臣王先謙敬編

臣張式恭恭校

二月壬申朔諭議政王軍機大臣等張集馨奏漢中收復逆匪紛竄等情形一摺賊分三股出竄漢中畱壩收復是否爲賊所棄劉蓉進兵甯羌而漢郡褒沔已無賊蹤所部各軍自應覘賊所向隨時調遣於有賊之處繞出賊前攔頭截擊或緊躡跟追與李雲麟及所派往紫陽西鄉交界之遊擊金殿安等軍前後夾攻卽著該撫籌定機宜與李雲麟聯絡調度張集馨所奏據各屬地方稟報賊竄甯陝而至鎮安並由洋縣渡河徑奔孝義廳境肆行焚掠等情乃係李雲麟昨奏賊竄三路中之一路惟甯陝係省城門戶賊之北竄深屬可虞鎮安之江口及金鎖橋距省匪遙已有賊蹤其

鄂縣之梁家橋地方更爲切近亦經有賊窺伺且爲多隆阿大營後路著多隆阿相機布置務將甯陝等處竄賊分兵截剿保全省城重地毋令賊得乘虛撲犯並遵疊次諭旨速將盤厓一城攻拔以免爲所牽掣省城內外防禦著張集馨嚴密籌備其所稱調回大峪口馬隊及該署撫所練省兵豫爲籌布暨城中稽查儲積各事宜均須與德興阿等實力辦理以備不虞毋得徒託空言臨時仍復一無所恃以爲戰守並嚴飭各屬地方激勵民團齊心抵禦力行堅壁清野之法使賊所至罔可掠食剿辦自易得手鳳郡逆回包藏禍心不遵多隆阿所頒禁約且將寶雞前紮回民馬隊擅自調回郡城其以乞撫爲暫行緩兵之計已屬確有明徵多隆阿已飭陶茂林將汧隴營伍調回著卽嚴飭痛加剿辦並將花花廟一帶迅速廓清毋稍延誤漢中收復情形究係如何著劉蓉查明

據實具奏前有甘省兩當徽縣匪徒欲竄由鳳縣以擾秦疆並著該撫隨時兼顧毋令賊得突越以與漢南出竄之匪潛圖蔓結李雲麟駐軍饒峯嶺兼顧興郡之防務須乘賊窮竄將甯陝及石泉等處兩路逆氛嚴行截剿並飭金殿安等軍迅由紫陽西鄉一帶截剿南路之賊迅圖掃蕩仍隨時與鄂豫兩省聲息相通聯絡接應以杜賊匪竄越之謀正在寄諭間多隆阿奏到漢南賊已東竄及鳳翔回逆仍須用剿各摺片與張集馨所奏皆同該大臣已調藍斯明等營折回商州並提催劉漢秀等勇營駐紮潼關金順等馬隊前往灃峪等處堵擊鳳翔回匪業經陶茂林進剿略有擒斬卽著嚴督各路之軍奮力防剿毋稍鬆勁將此由六百里諭知多隆阿德興阿劉蓉李雲麟並傳諭張集馨知之○諭勞崇光等奏黔省下游各屬剿匪獲勝並清鎮等處軍情見在進攻開州各一

摺黔省下游各屬被匪滋擾幾無完區鎮遠黎平之苗匪思南都勻思州各府之教匪蔓延日久經各該地方文武勦辦或攻破賊巢或收復村寨或疊獲勝仗辦理尙屬得手惟各該處匪徒均未全股殄盡地方尙未肅清勞崇光等亟宜籌畫兵食督飭在事各員乘此聲威速將各股匪徒悉數埽除以期盡絕根株毋畱餘孽其石阡府屬之教匪見在勦辦情形若何未據勞崇光等奏及著督飭該處官紳實力勦洗並將見辦情形隨時具奏其滋擾附近省城一帶股匪逼近清鎮攻陷龍里經勞崇光等派兵攔截將賊匪擊退並將龍里縣城克復江內東西南三面均已肅清此股逆匪逼近省垣勢尤猖獗沈宏富等見在分路進攻開州著勞崇光等嚴督該將士等迅將開州滅垣攻克並將竄向貴定一路賊匪實力追剿殄滅淨盡以期一勞永逸張亮基奏患病懇請賞開署

缺已賞假一月調理矣見在黔省羣盜如毛全境蹂躪殆徧開州及尙大坪等處巨匪屢窺省垣逼近肘腋值此軍務喫緊之時該署撫豈得以下游各屬小有勝仗遽爲退諉息肩之計也將此由五百里各諭令知之○予貴州殉難知縣余守鍾祭葬世職建祠典史余起鵬祭葬世職附祀○甲戌諭張集馨撥款贍西安八旗莞獨○乙亥沈葆楨奏准留國藩咨稱侍逆由溧陽上竄江西臣計該逆必趨稍爲完善之地乃有所掠皖之青建江之彭湖皆徧地榛荆居民以草充食饒州以北暫可無虞卽飭道員席寶田統精毅營道員陳鳴志鄧子垣統精捷營出婺源副將韓進春統韓字營出玉山爲遊擊之師道員張岳齡統平江營守廣豐縣城副將顧雲彩統仁右營守玉山縣城各軍當可陸續到防據探賊分六股號三十餘萬從廣德甯國翻山而行其來甚疾入皖界者正

月初六日至績溪初八日侵及歙境總兵唐義訓迎剿頗有斬獲入浙界者初四日至昌化初七日由五都侵及淳安境初八日副將王開琳以老湘營由屯溪援徽初九日提督黃少春以克勇由餘杭抵嚴惟留國藩所派遣員毛有銘一軍尙無南渡消息浙江稍急王開琳必將回援李侍賢黃汶金大股均在後路伺隙而來祁景之師未易輕動屯溪無兵扼紮徽南處處空虛臣續飭席寶田等相機進剿務與徽浙之師聯絡添調守備楊錦斌統衛民軍赴玉山爲韓進春後應道員王德榜之長左營由浮梁拔歸信郡署總兵普承忠統贛鎮兵進扼撫州樂平縣知縣孫鑑挑練丁二千人以保其本境其原紮祁門道員王沐之繼果營原紮景鎮督糧道段起之衡湘祥字等營皆令兼顧東路以期周密又奏續據探報正月初九日總兵唐義訓副將王開琳會剿績溪該逆遁由

歙南之深渡過河竄入淳安縣界當將績溪縣城收復其由昌化
淳安來者掠至遂安境上去開化僅百餘里此股爲忠逆所部約
由浙界入廣信第二股爲侍逆約繞閩界入建昌第三股爲僞小
西王約由徽北入湖口第四股爲僞小東王約由徽南入景鎮均
曾於撫州等語查該逆計窮力竭終爲流寇擊之則分道而竄堵
之則翻山而行辦理本屬費手若再蔓延閩界則更勢若燎原應
請飭下福建一體嚴防以資犄角 上諭議政王軍機大臣等該
逆率銳南趨江省軍情萬分喫重沈葆楨分調各軍於婺源玉山
廣豐等縣駐紮布置尙屬周妥惟賊勢太盛剽疾異常稍有疏虞
勢必闖入江境著沈葆楨嚴飭各路將領認真防守務與徽浙之
師聯絡聲勢互相策應其竄往淳安遂安境內之賊若江省防堵
嚴密必將折竄浙東左宗棠進攻餘杭如急切尙難得手自應力

顧後路抽調兵勇赴衢嚴一帶相機迎剿兼顧徽防毋稍疏懈該逆既有由閩入江之議不可不豫爲之防並著左宗棠徐宗幹迅卽調派得力兵勇並督飭地方文武嚴扼閩疆毋令竄越毛有銘一軍曾否啟行著曾國藩嚴催該道員迅速渡江或由徽北扼賊入湖口之路或前赴休甯與王開琳會師截剿均著該大臣相機妥爲調遣毋落後著上年李榕駐軍彭澤等處熟悉該處地勢該運司見紮何處該大臣務當酌度緩急或將此軍調赴上游剿辦自更得力南竄之匪號稱三十萬眾廣德自必空虛溧陽爲忠侍兩酋巢穴若由此兩路進兵或扼其咽喉或攻其要害皆爲該藩所必救之處縱不能必得而以堅壘相持亦可繫忠侍等逆之足使不逞以待其敝諒曾國藩李鴻章等亦必能審度及此鮑超昇否仍在東壩東壩固係入蘇門戶能否另易他將駐守而以鮑超

之軍分路進攻俾賊匪首尾不能相顧卽著曾國藩酌量調派曾國荃圍攻金陵近日情形若何賊糧尙足賊守尙堅自未能剋期攻拔曾國藩仍當飭令曾國荃嚴密合圍斷其接濟以收聚殲之效戈登郭松林進取宜興有無勝仗常州之師曾否得手著李鴻章激勵諸軍迅圖攻克乘勝移軍溧陽蘇省軍威日盛亦足以牽制賊勢使不暇擾我完善以援救金陵漢中踞匪率眾東趨據多隆阿張集馨先後奏稱逆酋僞扶王等接南京來信蘇州已經官軍收復調各僞逆回援見由石泉鎮安等縣全股東竄等語該逆無故棄城而走其爲金陵逆酋嚇使無疑本日已調僧格林沁駐師豫境力遏賊氛皖北伏莽未清恐僧格林沁拔隊以後餘燼復然著曾國藩豫作準備防其竄逸句合毋得稍涉大意將此由六百里各諭令知之○諭張集馨奏湘果各軍已於正月十一日克

復漢中郡城髮逆竄至西鄉石泉地界屢撲甯陝廳城均經在城官紳兵勇擊退該逆見由東河賈家營向鎮安而去晝夜行走勢不停畱已飛咨湖北河南各督撫一體嚴防各等語漢南髮逆全股東趨意圖竄擾楚豫爲回救金陵牽掣官軍之計其謀甚狡豫省兵力單薄張總愚一股尙未就殲若爲髮逆所勾結勦辦必更棘手僧格林沁布置皖省事宜已否周妥著卽酌量情形督帶兵勇進紮南陽一帶迎頭截勦如一時尚難離皖卽著派得力將弁統帶勁旅星馳赴豫會同該省兵勇扼要堵截勿任闖入腹地張之萬務當督飭地方文武員弁認真防勦不可稍有疏失張曜一軍勦辦張總愚股匪久無成效著該撫嚴飭該總兵迅速圖功剋日蕝事庶可騰出兵力痛殲髮逆若任令外匪入境與張總愚聯成一片蔓延爲患定惟該撫等是問決不寬貸鎮安接壤鄖襄該

逆前次本有會兵襄陽之說不可不豫籌防範著官文嚴樹森督飭在防各軍實力截擊並添派勁兵前赴鄖襄一帶探蹤迎剿毋稍大意湖北河南如能嚴密堵遏該逆窮無復之難保不分竄商南由豫窺晉著沈桂芬相機設防妥籌辦理陝西省城防務雖鬆張集馨仍當隨時偵探如城固西鄉之賊竄近子午谷各口卽著溫德勒克西等痛加剿洗盤屋連日進攻甚急夜不撤隊諒可得手多隆阿務當激勵將士迅復堅城以便分兵策應顧全大局將此由六百里加緊諭知僧格林沁官文多隆阿嚴樹森張之萬沈桂芬並傳諭張集馨知之○丙子毛昶熙奏汝陽正陽漸次肅清見赴息縣督剿得旨著卽激勵各國將息縣新蔡捻圩一律掃蕩漢中髮逆有紛竄南陽之信並著會同張之萬力籌堵禦毋令擾及完善以副委任毋託空言○丁丑諭議政王軍機大臣等曾國

藩奏覆陳遵旨札調李世忠到營大概情形等語曾國藩疊接李世忠文稱五河縣城業已交出弁勇業已撤遣其滁全等城亦可次第交出該大臣於行文咨令散遣部眾外並給予李世忠信函屬其自赴安慶或派親信大員赴營面商遣勇事宜惟部眾能否悉遵約束該提督能否親赴安慶及江北各城如何派營接防須俟李世忠呈覆到日奏明辦理是曾國藩辦理此事已有端緒李世忠措詞既甚馴謹曾國藩復能示以不疑諒無不肯赴營之理曾國藩總須俟其交齊各城悉遣部眾後卽行設法將該提督調至軍營資令幫同剿賊其事方爲萬全河南信息伏莽未除張總愚捻股尙在南召一帶山內近日漢中髮逆復有分竄南陽之信情形甚緊著僧格林沁遵照前旨迅卽拔隊啟程前赴豫省駐紮調度防剿一切事宜所有李世忠部眾如何妥協遣散所畱二千

人是否分隸各營如何管帶調遣及交出各城如何派營接防均著責成曾國藩悉心籌畫妥速辦理不可稍涉大意致畱後患○諭前因張集馨多隆阿李雲麟先後奏陳收復漢中畱壩賊匪分股東竄疊經諭令多隆阿嚴防陝省隘口湖北河南各督撫迎頭堵截茲據劉蓉奏收復漢中賊匪東竄情形與張集馨等所奏大略相同該逆因蘇州克復意圖回援金陵率眾東竄行走甚疾川軍甫抵漢中城固而逆蹤已及漢陰石泉勢必一由山陽商維以趨豫省一由興安一帶以窺鄂疆若令竄出山險則平原曠蕩勢必紛擾蔓延堵截更難得手劉蓉務宜督率諸軍星夜東下乘勢追擊一面飭令李雲麟迎頭扼截毋稍鬆勁並著官文嚴樹森飭令襄陽在防將士嚴扼要隘仍添派勁旅馳往策應以厚兵力豫省與陝西商維交界地方卽著張之萬添籌兵勇鼓舞鄉團嚴扼

山險毋令賊蹤竄入以期與陝省追師前後夾擊前因豫省兵力較單諭令僧格林沁親督援師或酌派馬隊先赴該省助剿恐一時未能遽到張之萬務當先期豫爲布置不可專待援師稍形鬆懈仍一面飭令張曜迅將張總愚股匪殄除勿任與漢中股匪合併陝省商雒一帶爲入豫門戶著多隆阿添派兵勇與藍斯明一軍迎頭扼截毋任逆蹤闌入豫省劉蓉追剿此股賊匪務當盡力追躡如該匪竄入楚豫卽著越境窮追與楚豫防兵聯絡夾擊不得稍分畛域盡疆自守致令滋蔓難圖如楚豫不能堵截任賊長驅視其竄擾何省惟何省督撫是問儻前截而後不能追惟劉蓉李雲麟是問將此由六百里各諭令知之○曾國藩奏僞侍王李侍賢賊黨於正月初六日攻陷績溪意將直撲徽州府城初八日署皖南鎮總兵唐義訓率所部八營自徽城出紮吳山鋪分駐新

營地方俄有賊隊擁至唐義訓催軍偪勦平毀賊館不少賊向績城孔靈兩路退走我軍斬馘尤多適左宗棠部將王開琳督帶老湘營自屯溪馳至唐義訓與之商定次日會師進攻初九日王開琳率隊由臨溪大路進唐義訓率隊渡過臨溪對河與賊戰於孔靈陣斬百餘賊追襲十數里將爲薄城之計王開琳自臨溪驅賊至七里牌踰卡而登直抵城南一帶賊遽返走入城唐義訓揮兵夾擊斜入城西賊由東北兩門遁出立克績溪縣城我軍仍回臨溪下寨維時賊之在大石門者已由大嶺竄至歙之南鄉距城三四十里其在昌化境內者已竄過威坪街口等處距城亦止百有餘里王開琳以賊趨南路慮越休甯斜竄而上引軍回駐屯溪唐義訓出佛嶺及南源口以截之初十日唐義訓聞績溪敗賊併聚於鴻琴七賢各村落移軍往駐南源口十一日風雪甚厲唐義

訓部隊進遞而進賊惶遽失措我軍入村搜捕俘執其酋誅匪殆盡十二日唐義訓迎擊昌化另股十三日追剿深渡零賊沿途鈔殺正擬進取街口威坪一路詎此路之賊已竄往遂安所屬之郭村而王開琳屯溪一軍旋出白際嶺赴援遂安矣查績溪攻克後旋有欽南之捷徽境暫告肅清而遂安一帶賊勢尙重見又擾及開化之馬金街該處一通休甯一通婺源一通常玉兩山臣所帶毛有銘一軍於十七日由安慶渡江計此時可抵休甯沈葆楨所派席寶田等移守婺源之軍韓進春等移守玉山之軍亦據報先後到防已飭各軍扼要分堵以遏賊蹤得旨遂安賊勢尙重見又擾及開化該處可通休甯婺源常玉兩山之路在在均須嚴防曾國藩當檄飭毛有銘之軍聯絡浙江江西派出各軍分路截剿迅速掃蕩毋令一賊竄入江西福建境內掣我一方方爲妥善勉之

慎之○調鄭敦謹爲直隸布政使王榕吉爲山西布政使○定
省督撫保題屬員例○諭德勒克多爾濟布置歸綏防務○戊寅
以復陝西高陵縣城予協領舒保等升敘○子陝西陣亡參將周
加明祭葬世職○己卯諭議政王軍機大臣等官文等奏皖豫各
捻闌入鄂邊派兵堵剿獲勝一摺皖捻王庭幹等由信陽一帶闖
入隨州之小林店經楚勇兵團擊走回竄桐柏之平氏鎮汝捻陳
大禧與平氏鎮之捻會合圍撲隨州亦經楚軍擊敗見竄棗陽著
官文嚴樹森督飭周鳳山趙克彰等將棗陽等處捻眾悉數殲除
前據張之萬奏皖匪由桐泌竄隨州之新城集嚴飭黃貴誠尹嘉
賓圖塔納拔隊追擊何以並未出境會剿黃貴誠前此追賊不力
僅止摘頂已屬罪重罰輕著該撫卽責令該員等實力進剿不得
強分畛域以鄰爲壑如再不知愧奮卽行嚴參治罪以警玩泄漢

中逆股出竄有犯鄖陽之意成大吉一軍既不能赴陝卽當派令速赴前敵認真迎剿若任令闖入楚境與藍二逆一股會合辦理更形棘手道員梁作楫一軍小有挫失是否足資堵禦並著該督撫妥籌調度無稍疏虞豫省張總愚一股未滅而漢南髮逆有分竄南陽之謠陳大澐一股亦恐被擊回竄實有防不勝防之勢前諭僧格林沁將皖事布置妥協酌量帶兵進紮南陽一帶否則酌派將弁帶兵會剿未知該大臣能否卽日移營前進楚省所需馬隊千名能否勻撥均著妥籌辦理迅速具奏吳棠前奏派郭寶昌等駐防徐郡統帶陳國瑞所部俟軍務大定再議裁撤陳國瑞患病是否業已痊愈其所部之四千人皆素經行陣屢著戰功河南見在兵微將寡僧格林沁進駐豫省後若得陳國瑞一軍歸其調遣必更可資得力著僧格林沁到豫統歸該大臣調度此數省邊

防均極喫重該大臣忠勇夙著務須通盤籌畫力顧大局用慰廑
繫將此由六百里各諭令知之○都興阿奏水師擊賊於小河等
處連戰皆捷仍諭令嚴防○庚辰諭議政王軍機大臣等劉蓉奏
官軍大破上元觀賊壘連克城固洋縣兩城見籌分路進剿一摺
逆匪陳德才黨與盤踞上元觀而漢中等處匪股出與合併希圖
抗拒經劉蓉督率官軍痛加剿擊大破上元逆壘乘勝連克城固
洋縣兩城軍威頗振惟城固敗竄之賊多往西鄉一帶藍逆餘黨
復竄華陽勢將徑趨整屋以圖合併劉蓉見飭何勝必肅慶高等
各營由西鄉一路跟蹤躡剿著卽督飭步步緊躡乘賊喘息未定
痛加剿洗將此股餘賊殄滅淨盡李雲麟前奏駐軍饒峯嶺兼顧
賊由甯國興安分竄鄂豫兩途此次劉蓉奏報何以有興安以下
文報久梗之言劉蓉李雲麟務須聯絡一氣覘賊所向盡力追剿

劉蓉身任陝疆無論賊躡何處均屬責無旁貸其藍逆餘黨既竄華陽將趨盤屋尤應與多隆阿聲息相通後追前擊前經疊諭多隆阿將盤屋一城攻拔以免全軍爲所牽掣何以尙未得手刻下尤應迅拔此城以免賊勢合併並可騰出兵力與劉蓉等會合掃除各路逆氛以清全陝曹燦章一股又由鳳縣所屬之黃牛鋪一帶敗竄郿縣著多隆阿嚴飭陶茂林所部乘勝追擊與劉蓉派往親兵英毅各營合力掃蕩張集馨前奏賊至西鄉石泉地界屢撲甯陝廳城經在城官紳兵勇擊退由東河賈家營向鎮安而去晝夜行走勢不停畱見已竄往何處是否卽係何勝必等從後追剿一股劉蓉李雲麟務須嚴督所部悉力窮追官文嚴樹森昨奏各路軍情於漢中等賊分竄甯陝西鄉之路勢趨鄖竹尙未深悉道員梁作楫一軍方於鄖西與藍二順股匪相持鄖邊再有賊股紛

乘此軍勢必難以分應著官文嚴樹森懍遵嚴諭嚴密籌布增兵堵剿張之萬於秦豫邊界實力嚴防仍督令張曜之軍速將張總愚股匪力圖剪滅毋任久延殘喘又致句結爲患張集馨毋得以西安防務較鬆稍涉大意其子午谷等處防賊復竄之路總須與溫德勒克西等隨時戒備劉蓉所部各軍已成尾退之勢如果能不分畛域窮追不已而鄂豫各邊防兵足遏其前李雲麟之軍及多隆阿所部又復從中攔截邀擊諒茲羣醜亦不難就地肅除也將此由六百里諭知官文多隆阿嚴樹森張之萬劉蓉李雲麟並傳諭張集馨知之○諭慶昀奏甯夏回匪不宜議撫等語據稱恩麟據世職金魁請派署提督定安會辦甯夏招撫事宜業經准令定安等督同回紳馬朝清前往開導設法招撫以顧目前惟甯郡情形今昔不同從前回漢互疑兩相仇殺原可官爲調處今則戕

官踞城逆回叛逆昭著若再議撫任令起滅自由勢必目無法紀益肆狂悖且該逆貪囊已飽正恐大軍前往剿洗此時一意主撫適足墮其緩兵詭計未可再示羈縻等語所奏不爲無見逆回反側無常狡謀百出金魁係甯郡世職回官尤難保非串同一氣故設此計以懈我軍心著恩麟督飭派出之梁生嶽等軍實力進剿迅掃逆氛毋得徂於目前專意辦撫一味粉飾養癰貽後日無窮之患雷正綰到甘後疊獲勝仗軍威較壯著卽統率所部由涇州節節掃蕩迅速北征將甯夏逆匪痛加殲滅以申天討而快人心慶昫惟當就見有兵力嚴密堵剿不得專待援師任令逆回益肆蔓延鹽固賊匪糾合靈州金積堡逆回分股竄擾甯安宣和等堡賊蹤蔓延及二三百里玉泉廣武等營均已失陷情形極爲危急應如何抽撥勁旅前往救援之處著熙麟等悉心籌畫妥爲布置將

此由六百里諭知慶昫熙麟雷正綰並傳諭恩麟知之○諭訥欽
奏歸綏地方安堵請派員帶兵合力會剿一摺訥欽帶兵行經歸
化地方安堵訪察並無甯夏回匪與該處回民勾結情事並接德
勒克多爾濟文稱歸綏一帶回漢均各安業如常訥欽所帶官兵
自可毋庸中路撥留該署提督見由五寨縣取道前進著卽於行
抵榆林部署一定速行整隊前赴甘境妥籌進剿救援甯夏等城
毋稍延誤直隸省續調官兵一千名由固關入晉據訥欽奏已咨
會劉長佑於通永鎮總兵徐廷楷署山永協副將海綏二員酌派
一員前往統帶以資得力卽著該督速行派定何員前往一面奏
聞並著沈桂芬將晉省大同鎮備調兵一千名飭令會合直省官
兵一同進發於太原大同二鎮總兵及副將內酌派一員管帶前
往以專責成訥欽仍遵前旨催提前項直晉兩省官兵迅速前進

併歸調遣用厚兵力而利攻剿訥欽所部之軍所需糧餉軍火仍著劉長佑沈桂芬懍遵前旨源源解濟毋令缺乏本日慶昫摺內所陳甯夏回匪情形於中衛靈州一帶蹂躪幾徧此等匪徒從未一受懲創該處地方望援孔亟訥欽接此旨後益當催集官兵迅圖進取仍於奮勉之中寓慎重之意將此由五百里各諭令知之○加賞普濟堂功德林賑米二百石展期兩月○壬午諭議政王軍機大臣等張之萬毛昶熙奏汝南各軍攻克息縣八寨並續克五寨暨剿辦李青店踞匪情形各摺片汝南官軍所在克捷剿辦甚爲得手著張之萬毛昶熙仍卽督飭各軍乘勝進剿務將息縣境內伏莽一律肅清毋畱餘孽張總愚盤踞李青店雖經張曜等率軍迎剿殲斃悍賊多名該逆眾仍負隅死拒未能十分得手該撫等見派蘇克金等馬步各隊分路布置以防出竄仍恐兵力尙

單無以固嵩洛之防復將尹嘉賓步隊從南陽移赴馬市坪以防
要隘所籌均尙妥協此股逆匪依山踞險抗拒官兵實屬異常狡
悍見在漢中賊匪紛竄圖擾南陽一帶若復與張逆勾結將來辦
理更形棘手著張之萬察度賊情如山中之糧將盡卽應實力進
攻滅此朝食否則圍師必闕或虛其一面誘賊出險令蘇克金等
馬隊遙爲設伏並令各隊分路兜擊以期一鼓殄除斷不可任令
四竄再有蔓延將此由六百里各諭令知之○諭毛鴻賓奏官軍
攻剿三山賊巢生擒首逆一摺匪首鄧二尺七於廣東連陽一帶
糾眾肆擾恃險負隅歷年進剿官兵均以山勢深阻未能覆其巢
穴此次臬司張運蘭移得勝之師乘勢亟進竟將積年巨憝一鼓
蕩平剿辦迅速甚屬可嘉惟該處界連數省峻嶺危灘萬重險阻
若不將餘匪搜捕淨盡恐官軍一撤必致又成嘯聚餘燼復燃著

毛鴻賓郭嵩燾督飭在事文武實力搜捕務絕根株並將應辦善後事宜詳細妥籌認真區畫以期一勞永逸將此由五百里各諭令知之○予廣東陣亡遊擊易永茂等祭葬世職○癸未李鴻章奏查郭松林等營會同戈登李恆嵩常勝軍進剿宜興李鶴章恐兵力尙單又命總兵楊鼎勳率所部協剿先後進紮河橋正月十九日戈登派洋將美敘羅殿至宜興城下察看地勢郭松林等帶隊同至北門將近城各賊卡一律燒毀該逆開城出拒我軍分路兜剿生擒三百餘名二十一日戈登李恆嵩率隊由河東進郭松林等各率所部由河西進水師各營沂流而上前任宜興縣知縣周守典亦帶團勇槍船助剿二十二三等日各軍進紮三里橋總兵曹仁美會同戈登李恆嵩攻東門外賊營郭松林等分攻上湖橋及西門外賊營並截溧陽援賊正在得手僞代王黃青忠大

股來援漸次撲近我軍以洋槍排擊該逆死傷相繼尙無退志當派總兵吳勝清鈔其左總兵彭述清等鈔其右副將高占彪等直擣中堅逆眾三面受敵遂不能支各軍勇氣倍增殲賊甚多敗逆向西狂奔復經各水師橫擊之自東汛至西汛追殺四十里燬奪大小賊船千餘隻援賊旣敗城賊勢孤戈登滕嗣武及遊擊王萬釗等環攻各門賊勢窮迫開西門而逃戈登飛騎馳至與黃中元併力合擊郭松林令已革參將李長樂帶馬隊追殺該逆竄逸無多餘眾乞降遂於正月二十四日克復宜興荆溪縣城城中降眾悉令薙髮分別遣散仍畱黃中元滕嗣武陸師五營鄧長里成俞卿水師二營駐守查宜荆二縣濱太湖西岸毗連三郡乃江浙之通衢常州金陵之後路中外各軍不出旬日速拔堅城從此蘇州無錫之防益固常州之克可期實於大局有裨郭松林戈登所向

克捷應與楊鼎勳等侯常郡克復再行彙案請旨優獎其攻破賊壘首先登城之諸將自應先行開列懇請恩獎其餘出力陣亡員弁俟查明彙案奏請辦理又奏宜興既復自應乘勝進圖溧陽戈登郭松林王東華等水陸六七千人業於二十七八等日陸續進發惟溧陽爲李侍賢老巢寶金陵後路咽喉賊所必爭必守之地金壇常州在其北句容丹陽值其西長興廣德當其南面面賊巢儻各城悍逆左右鈔援前與鮑超東壩溧水之軍相隔不能接氣後距李鶴章劉銘傳常州之軍稍遠不及分救孤軍深入轉可危慮臣飛飭郭松林李恆嵩商同戈登安慎進止就近密約鮑超東壩溧水防軍前後兜擊並催令李鶴章劉銘傳猛攻常郡須先破其西門援賊各壘然後合力攻城常郡果卽得手則旁縣可漸次肅清至嘉興賊糧最足志在死守程學啟劉秉璋潘鼎新等攻破

東北門外及東南角鹽倉橋賊壘多座連日苦戰斬馘頗多諸軍直抵城根查嘉興榮逆前曾乞降以緩我師程學啟等察知其詐定議痛剿果以死拒見在東北門外隘口多壘均已毀平惟餘城根一營卽日乘勝偪剿合攻城垣以期漸次得手惟湖州踞賊圖援嘉興意欲撲犯盛澤平望兩鎮擾我後路經李朝斌水師數營及淮揚水師楊宏勝等擊敗臣飭程學啟李朝斌隨時分隊扼堵庶保無虞此次出力將士陣亡員弁可否容臣查明彙覈分別獎卹出自格外恩施沈葆楨奏逆匪從遂安小路疾走第一股由開化華埠至玉山之七都正月十九日直抵距城十里之十七都適仁右營抽隊出哨斃賊多名是晚韓字營頭二隊紮營於城西該逆遂趨廣信二十日由大南橋竄往廣豐二十一日平江營偕練勇出哨於城北五里之叉路頭見賊數百疾趨殪其前鋒數人遂

返走屯聚於三官殿等處蔓延數十里其第二股由開化窺婺源
十二日精毅營至十六日精捷營至該逆聞婺源有備將由白沙
關犯德興二十日精毅營統領道員席寶田等率隊馳擊該逆頭
隊踞規橋尾隊踞歇嶺以中隊由大濟關下橫過泥嶺關翻山而
竄席寶田等隨直入進扼規橋副將邊曉堂等由間道奪泥嶺關
守備魏玉彩等奪大濟關頭隊中隊之賊遂陷入谷中與歇嶺路
絕乃以悍黨數千向泥嶺關猛撲我軍短兵相接殺賊極多餘賊
遂伏谷中負嵎待援其歇嶺後股之賊犯大濟關魏玉彩等擊卻
之谷內之賊攀嶺求出冰雪中跌死者無數自辰至酉血戰竟日
陣斬安天義峴天安擇天義珊天燕叨天福諸逆目殺賊二千餘
人生擒四百餘人餘逆從歇嶺翻山竄德興南鄉入玉山界查第
一股多花旗係黃逆第二股多黃旗係侍逆所部侍逆全股尙未

到也見在涇遂一帶源源而來臣已飛催祥宇等營並催總兵普承忠迅至撫州駐守添調廣昌營協守建昌銅鼓營協守臨江然人數尙單又咨請督臣曾國藩另派一軍守祁門俾繼果營得以回顧本省祁門旣爲西江門戶又係督臣糧臺關係至重當飭該營俟接防軍到再行啟程 上諭議政王軍機大臣等宜荆二縣濱臨太湖界連三郡此次戈登奮勇自效李鴻章復抽派精銳會同前往先破附城十餘壘擊退溧陽大股援賊遂拔名城從此蘇錫之防益固常州之克可期實與大局有裨據該撫片稱宜荆旣復自應乘勝進圖溧陽戈登郭松林等水陸六七千人業於二十七八日陸續進發惟該處爲李逆老巢金陵後路羣賊所必爭之地儻孤軍深入面面受敵深可危慮著李鴻章密飭戈登等步步爲營務須謀出萬全不可輕進貪功致有疏失曾國藩當檄飭鮑

超東壩溧水防軍前後兜擊以期聲勢聯絡西路賊情地勢以常州爲關鍵常郡果能得手則旁縣更成破竹之勢李鴻章卽催令李鶴章劉銘傳設法攻取先破城外賊壘自必更有把握嘉興賊糧尙足逆酋志在死守程學啟等已攻破東北門外賊壘多座督軍直抵城根賊眾雖多殲斃我軍亦不免傷亡榮逆前次詐降以緩師期今復堅守以待援賊實屬異常兇狡該撫務令程學啟等妥速籌攻毋稍鬆勁湖州踞逆圖擾盛澤平望撲犯後路爲李朝斌等水師擊敗並著督飭各軍認真防剿毋令與嘉興城逆勾合正在寄諭間據沈葆楨奏髮逆內竄截剿獲勝後股仍源源而來該撫飛催各營迎剿又咨曾國藩另調一軍守祁門俾繼果營得以回顧本省等語髮逆上竄江西關繫左宗棠後路該省又爲曾國藩軍營餉需所自出若有疏虞牽掣東南全局其患不小刻下

江路肅清彭玉麟楊岳斌二軍數月以來水師均無戰事著曾國藩卽派楊岳斌酌帶戰船數百號駛赴鄱湖擇要駐紮江忠義所部見歸陳鳴志等統帶威望尙輕而所調之江忠朝一時恐難赴營此軍卽可交楊岳斌兼行統帶該提督謀勇素著諒能認真督辦力顧江防曾國藩仍當隨時與沈葆楨商酌妥籌策應以期萬全無失沈葆楨卽就見有兵力嚴飭各路將弁實力堵剿毋稍鬆懈左宗棠仍遵前旨密防衢嚴一帶並於江浙交界處所添派勁旅會同江省防軍合力夾擊其由歇嶺竄德興入玉山之賊人數尙有若干官軍戰守情形並著沈葆楨續行馳奏以慰廬念將此由六百里各諭令知之○理藩院奏阿拉善親王貢桑珠爾默特報稱甯夏逆回猖獗該旗逼近賊氛請飭鄰近旗分領兵赴援並請賞給大礮火器以資防剿得旨著理藩院卽行轉飭鄰近內外

各盟厚集兵力迅卽馳抵阿拉善協力嚴防毋稍延緩其所請大礮火器卽著理藩院行知綏遠城將軍德勒克多爾濟酌量撥給仍飭該王懷遵前旨認真防堵勿任回匪闖入本境至鄂爾多斯旗爲該旗東界地方遼闊著一併由理藩院轉飭該處一體嚴防毋令東竄○予陝西殉難遊擊金鎮西祭葬世職○予江西因公淹沒知縣夏掄謨卹廕○乙酉諭議政王軍機大臣等前因崇實賂秉章奏密陳西藏情形請權宜辦理當經密諭崇實等催令滿慶等到川卽令李玉圃迅速來京並諭福濟景紋趕緊赴藏茲據福濟奏遵旨啟程行抵雅郡據史致康稟稱在鎭城竭力開導明正土司已允設站支應烏拉裏塘土司因藏中復派糧員李玉圃帶兵出剿瞻對據裏塘土司呈出藏中來信見有大兵來剿瞻對復狡懇調兵助剿又執拗不卽設站等情見在由鎭城以至乍察

惟遞交文報夷人可以單身往來中間夾壩橫行商旅裹足卽文報亦常被劫失實難隻身前進惟藏事敗壞由於李玉圃暗爲主謀滿慶任聽愚弄該二員如不卽離藏必仍藉勦辦瞻對以逞狡謀不特土司撤站有所藉口驛路終難疏通更恐瞻對邊釁愈啟愈大李玉圃與汪曲結布朋比爲奸兵權在手其意更不可測請飭滿慶速將李玉圃所帶藏兵撤回並諭滿慶李玉圃迅速赴京等語滿慶等懷私挾詐把持藏務福濟景紋一日不能到藏禍患一日不了著福濟景紋仍遵前旨趕緊由川啟程前往毋再遷延推諉若仍一味畏葸置大局於不顧恐福濟景紋不能當此重罪也前次寄諭恐崇實等尙未接到著再鈔給閱看前照崇實賂秉章所請另有寄滿慶等諭旨一道仍將崇實賂秉章福濟景紋四人銜名敘入以釋滿慶等疑慮亦未識曾否奉到再一併鈔給閱

看此次仍有另寄滿慶等諭旨一道著崇實等迅卽行文知照將此由六百里各密諭知之○諭前因時徵控訴各語難以憑信並辦理藏務不能秉公斷難復令回藏諭令滿慶等責成汪曲結布協辦藏務勦辦瞻對之藏兵卽行撤回查明李玉圃勞績會同崇實等保奏送部引見並令滿慶回京催福濟景紋迅速赴藏茲據福濟奏遵旨啟程行抵雅郡因裏塘土司不肯設站未能前進等語藏中事務關繫緊要福濟等亟應星馳前往以資安輯著福濟景紋仍遵前旨趕緊赴藏並著滿慶等曉諭明正等土司照常安設驛站毋令再有阻滯所有一切辦法已於本年正月初三日寄諭內詳細指示著崇實賂秉章福濟景紋滿慶恩慶懍遵前旨迅速妥爲辦理卽行奏聞毋再稍涉遷延將此由六百里各諭令知之○丁亥諭內閣僧格林沁奏審明苗逆黨與定擬罪名等語苗

黨潘塏並其子潘立勳前被擒匪裏去投誠後因其勦擒出力辦理霍邱一帶團練給予官階自應實心報效乃苗逆叛亂後膽敢助給船隻運送銀米管理三河尖釐卡又復倚勢把持明隨官軍辦事暗與苗逆勾通覈其情罪萬難寬貸姑念苗逆此次圍攻蒙城該犯等並未同往助逆尚可稍從末減五品藍翎候補知縣潘塏參將銜藍翎遊擊潘立勳均著卽行革職發往烏里雅蘇台交該將軍嚴加管束苗逆倡亂兇殘甚張其間被偏脅從者所在多有而潘塏父子以一團民因勦擒微勞屢保官職乃竟不知大義首鼠兩端非若鄉愚被偏出於無奈是用從重懲辦此外被脅小民業已悔過自新真心歸正朝廷斷不苛其既往也將此通諭知之○僧格林沁國瑞奏張總愚一股見仍盤踞豫西南召一帶倚山負固臣等前派翼長蘇克金帶領馬隊馳往會剿因該逆仍踞

山中馬隊難以進擊臣等撥步隊兵勇二千三百名派提督傅振邦督隊前往魯山一帶會同蘇克金酌覈勦辦已於正月二十八日啟程惟雨雪載途行走未能迅速茲准張之萬函稱擬俟傅振邦兵到會合蘇克金馬步痛加勦洗見在皖境雖就肅清其善後事宜仍須妥籌辦理撫臣喬松年月內諒可到皖臣等擬俟該撫臣到任將皖北事宜面爲商定後卽當移紮豫境相機防勦上諭議政王軍機大臣等偕格林沁撥兵赴豫會勦擬俟喬松年月內到皖將皖北事宜面爲商定卽行移紮豫境所籌均屬周妥傅振邦一軍連日應已到豫著張之萬嚴催張曜會同傅振邦等設法進攻務將張總愚一股就地殲除毋再延緩干咎該逆乞降之說無非翼緩師期懈我兵力萬勿爲其所惑致有疏失漢中髮逆陳得才大股本日多隆阿奏前隊已到山陽後隊尙在甯陝一帶

刻下曾否竄在豫境何以未見張之萬奏報著遯派委員勤加偵探早爲防備以免臨事掣肘喬松年計可卽日到皖偕格林沁務當趕緊部署俟與喬松年見面商酌辦法後卽行移紮豫境相機調度以資控制將此由六百里各諭令知之○諭多隆阿奏連日圍攻盤屋及各路防剿情形一摺據稱盤屋城身甚厚賊守甚堅官軍連日併力進攻受傷至三千餘人之多仍未得手各情該逆固係積年猾賊長於守禦惟前據奏稱盤屋業已合圍何以賊之米糧火藥未見匱乏多隆阿頓兵堅城曠日持久又何以不知出奇用計絕其糧道使之內亂徒令傷損精銳如此之多覽奏實深憤懣著多隆阿迅卽相機妥辦趕緊攻克以期轉敗爲功如再有挫失或日久不能得手惟多隆阿是問鳳翔北山回逆經陶茂林剿敗西竄官軍已抵汧陽著飭陶茂林盡力剿洗毋再輕易言撫

貽誤事機並飭曹克忠由招賢鎮進剿雨亭寺等處之賊期與雷正綰等會同夾擊肅清陝境進規平涼髮逆陳得才大股前隊已到山陽後隊尚在甯陝一帶劉蓉見至漢中自應恪遵前旨緊蹙賊蹤分投追剿此股逆匪因金陵逆首調回棄城東竄剽疾異常若追軍少事遷延勢必蔓延楚豫劉蓉務當激勵諸軍迅速前進不得以收復漢中郡縣遂可塞責李雲麟駐紮饒峯嶺曾否與賊接仗東路之防是其專責何以日久竟無奏報著卽督率所部偵賊所向與劉蓉追賊之軍前後兜剿盡殲醜類儻剿辦不力任賊東趨恐劉蓉李雲麟均不能當此重咎也將此由六百里各諭令知之○允閻敬銘請俾山東畝捐○戊子諭議政王軍機大臣等張凱嵩奏官軍按剿梧州府屬賊匪次第戡定並派兵會剿李七匪黨道覆各屬賊股及擬分別撫剿情形各摺片粵西梧州一府

界連東省壤接潯州積年兵燹爲寇盜出沒之區其間被脅及甘心附賊各村寨均經該撫督飭文武及地方官紳乘容岑兩縣收復軍威克振次第剿撫蒼梧藤縣各屬之桃源垌鶯兒寨糯洞等賊巢其蒼梧所屬匪徒最多之古薩等村亦已歸誠反正廣平一墟賊勢尤悍復經攻破僅餘逆首李木火率其殘黨遁匿墟外高巖苟延殘喘著張凱嵩仍督各軍乘勢圍攻務將李木火殲擒掃除餘黨毋畱餘孽其各從逆之處究竟有無遺孽未清就撫之民如何方能約束盡善尤須督飭帶兵文武及各地方官徹底清釐妥實經理岑溪縣屬之撫民梅新一股尙在逗畱未回西甯本籍尤須防其反側復生著飭令道員蔣澤春唐啟蔭勒催啟程沿途並飭嚴加鈴束仍將容縣善後一切徹底安辦李幅猷餘黨李七盤踞黎平之四寨河句結頑苗爲患經該撫派兵會同黔楚官軍

合力進剿該匪復由丙妹渡河折竄蔓延古州之三百生苗地方與羅城思恩兩縣毗連著卽督令派出副將黃仲慶等迅速探明賊蹤徑趨黔境與楚黔各軍奮力兜剿痛加掃除此大越境援剿尙能竭力籌兵撥餉畛域不分所辦尙屬妥協其遵查粵西各屬股匪剿撫將次肅清所擬善後八條通行辦理亦屬妥善第須實力奉行教養兼施以求實效毋得徒託空言以爲塞責仍將黃三跽伏平天一寨督飭劉坤一激勵各軍迅速攻擣埽穴擒渠一俟該逆削平卽將潯軍分起進剿思南鎮太各屬土匪以次戡除速清邊圉泗城一屬雖無股匪尙與滇黔毗境時虞鄰匪侵軼卽著嚴飭該地方官吏聯絡鄉團實力備防桂平柳慶等屬見在雖已無賊而瘡痍滿目百廢未舉且與貴州黎平等屬毗連張凱嵩當加意撫輯整頓不得以爲地方遂可無事仍隨時慎選廉能之吏

能知教養者以善其後母任闡穴濫厠以致閭閻擾累復滋事端
此次梧郡所屬剿撫出力人等准擇尤彙案保奏毋許冒濫將此
由五百里諭令知之○王明奏奉天匪黨李青山等就擒請遣撤
防兵歸伍允之○允神機營撥款儲備軍械○庚寅曾國藩奏會
國荃駐師雨花臺以來奪取附城諸要隘東西南三面悉爲我有
惟鍾山僞壘尙未克復城北兩門尙未合圍終不能制賊之命曾
國荃商之楊岳斌飭派彭楚漢丁泗濱各師船雪夜巡江見奸民
小划載米偷渡輒要而奪之以斷江面接濟又派朱洪章等營各
出三成隊繞過鍾山之後分夜輪擊以絕陸路接濟然城北地面
太寬洪逆與忠酋踞守老巢仍堅伏不動其楡運賊糧亦有防不
勝防之慮曾國荃調韋志俊五營渡江守金柱關騰出朱南桂等
六營助圍金陵甫至三汊河適因雨阻頓兵未發比至正月十六

日始令陳萬合等營由草鞵峽登岸朱南桂等繼進將欲移營城北旋於二十夜偵知忠酋之子率黨數千自太平門赴句容護糧進城朱洪章等潛約各營伏兵要路截擊斬馘七百餘級執二百餘人棄糧阜積狼藉道左次日曾國荃親督朱南桂等各率親兵槍隊至洪山北固山神策太平等門外周歷形勢適忠酋先由城中糾大股出鍾山之南猛撲嘉字營濠牆我營以槍礮憑牆環擊賊不少卻朱洪章與武明良等遂畱兵守定營寨一面率隊出濠分路夾擊殲賊數百賊乃返走上山鍾山之巔有石壘僞名天保城羅雨春攀崖直上沈鴻賓率哨弁繼至會合朱洪章武明良等四出鈔殺該匪無一得脫立將鍾山石壘克復曾國荃飭黃潤昌熊上珍移紮山嶺分戍天保城二十四日派蕭孚泗蕭慶衍馬步各二營出山北分隊太平門外護修二壘以王遠和等營守之繼

時梁美材所部紮洪山朱南桂所部紮北固山堵住神策門大路僅餘元武湖一段無兵分布然隔水甚寬援賊不得入城賊不得出而金陵城北自此合圍見在距城百里之外如鎮江東壩溧水金柱關均有重兵駐守宜興溧陽二縣又新經蘇軍克復外援將絕糧米無多如果克此堅城當不至有大股逸出貽患地方惟是圍師不滿五萬分布九十餘里偏困數十萬賊深慮窮寇衝突抵隙蹈瑕惟有嚴飭各營加倍穩慎以圖進取又奏侍逆之黨僞凜王一股於正月十七日由胡樂司續竄績溪十三都時唐義訓在歙南剿賊移軍馳至績境賊見官軍卽走僅斬尾隊數百而還其另股之闌入遂安者十五十七等日經王開琳迎擊於中洲昏口一帶疊有斬擒賊乃由馬金街華埠分枝一向婺源一向玉山其向婺源者由白沙關內犯席竇田等軍於二十日在規橋頭大獲

勝仗其向玉山者由六都球內犯韓進春一軍於二十三日在洋
口大獲勝仗該逆雖屢經敗挫而銳意上竄但求覓食偷生絕不
返顧見已繞至廣豐又繞至鉛山湖坊勢將蔓延腹地窺伺撫建
兩郡臣調席寶田軍援剿廣王撫建等處又與撫臣沈葆楨咨商
或添調繼果等營回顧江西腹地所幸此次竄擾江西非大股極
悍之賊除忠逆繫在金陵勢難他竄外如黃汶金尙在湖州楊輔
青未知的在何處侍逆溧陽老巢新爲蘇軍所破聞該逆率其黨
與歸併湖州目下湖州賊數極多由安吉孝豐昌化遂安以竄江
西毫無阻隔如侍堵等逆接續上竄則三省交界之游兵江西內
地之防兵均嫌單薄臣當嚴飭唐義訓毛有銘等軍慎守徽休兼
顧馬金街一帶以固藩籬 上諭議政王軍機大臣等曾國荃親
督諸將攻取鍾山石壘奪回天保僞城派營戍守並紮營扼斷神

策太平兩門大路金陵城北之圖自此始合所辦甚合機宜惟是官兵不滿五萬分布地段甚長深慮困獸猶鬪亟思一逞曾國藩務當飭令曾國荃督率諸將穩慎進攻晝夜嚴防必須就地殄除毋任竄突他處以竟全功而膺懋賞該大臣所稱侍逆溧陽老巢新爲蘇軍所破聞該逆率其黨與歸併湖州目下湖州賊數極多由安吉孝豐昌化遂安以竄江西毫無阻隔等語著左宗棠添調得力兵勇遏截由昌化遂安上竄江西之路並嚴防衛嚴等處俟餘杭克復設法進規湖州以牽賊勢侍逆之黨分股內犯雖屢經江西防軍擊敗而絕無返顧之心見已繞至廣豐又繞至鉛山湖坊勢將蔓延腹地窺伺撫建兩郡曾國藩已調席寶田軍援廣玉撫建等處又與沈葆楨咨商添調繼果等營回顧江西腹地卽著沈葆楨從長計議飭令在防將弁認真堵剿勿令一賊闖入腹地

如侍堵等逆接續上竄江西防兵單薄曾國藩仍當調派勁旅趕
緊援救以固藩籬而維大局前諭曾國藩派楊岳斌酌帶戰船數
百號駛赴鄱陽湖擇要駐紮並將江忠義舊部歸其統帶此時江
省防務十分喫緊該督撫務卽籌商妥調以期萬全無失將此由
六百里各諭令知之○諭富明阿奏布置江防情形一摺另片奏
逆眾竄奔陽舍常熟安籌北岸防剿等語丹句逆眾添集黨與窺
犯江陰屢撲包港小河等處雖經水師擊退而逆計詭譎時圖一
逞見在忠逆之子及僞潮王等率眾五六萬從江陰南門外花山
直奔陽舍常熟等處賊蹤飄忽散布沿江難保不聲東擊西肆志
北竄富明阿見派撥兵勇二千駐紮四墩子靖江兩處分爲犄角
以爲廖長明一軍策應並飭吳全美嚴督師船晝夜梭巡加意防
範又恐揚防兵分見單擬調蔣壩防軍回揚藉資抽撥所籌均尙

周安卽著該將軍督率在防將弁實力防剿毋任該逆得以竄越
總兵安勇所部一軍旣經富明阿撤回揚防其蔣壩地關緊要應
否仍設防兵卽由吳棠就近酌度情形妥籌辦理江陰防務前據
李鴻章奏有駱國忠一軍足資守禦此時賊蹤已偏縣城且分竄
陽舍常熟一帶該處軍情日形喫緊該撫務當督飭在事文武兵
勇痛加剿洗盡殄賊氛毋令蔓延爲患都興阿見已啟程北上所
有江甯將軍印務卽著富明阿暫行兼署以重職守揚防見形喫
重自應先顧藩籬總兵詹啟綸著照富明阿所請俟防務稍鬆再
行前赴鎮城密探軍情妥籌會剿將此由六百里各諭令知之○
諭李雲麟奏川楚各軍齊進髮逆避擊狂奔及收復西鄉各情形
一摺髮逆分股東竄經李雲麟督帶兵勇在繞峯嶺截剿進赴土
門埡扶逆餘黨尙踞兩河官軍奮擊逆眾宵遁僞天將馬逆繼至

亦被官軍擊敗該逆等知中路難犯欲由石泉漢陰交界之三官廟直犯興安鈔楚軍後路官軍分投防堵該逆在鎮安屬之手扒巖一帶遊弋其啟逆一股因石泉有備仍折回甯陝邱逆亦率黨北趨併歸一處已由鎮安至西鄉之子午汛首尾不斷縣互三百里而藍二順股匪復由鄖西擾至洵陽縣屬之蜀河是興安上下均形喫重雖經李雲麟分派水陸各軍聯絡鄉團嚴密防守第賊勢太盛必須前後夾擊始可遏截狂氛著李雲麟嚴飭各軍認真堵禦固守興安郡縣毋爲該匪所乘洋縣城固業經劉蓉收復李雲麟又復收復西鄉計兩軍相去不遠何以劉蓉李雲麟奏報聲息仍未相通著劉蓉懍遵前旨速飭何勝必蕭慶高等迅卽督勇前進緊躡賊蹤務與李雲麟會合兜剿就地殲除儻任意遷延不以追賊爲事將來東路稍有疏失必惟劉蓉李雲麟是問甯陝一

帶之賊前據多隆阿奏相機遏剿不任蔓延見在邱逆又復北趨
西安門戶之防最關緊要多隆阿務當妥籌防剿毋稍大意並著
張集馨將省垣防守事宜豫作準備仍協同溫德勒克西等嚴防
子午谷等處要隘毋得稍有疏失藍二順一股見已折竄洵陽鄖
西情形稍鬆官文嚴樹森當不分畛域飛飭梁作楫等越境追剿
毋得坐視興安之急不思設法應援該逆圖救金陵銳意東竄不
走湖北必走河南節經諭令該督撫等先事籌防著官文嚴樹森
張之萬分飭派出將領隨時偵探賊蹤迎頭截擊毋令該匪竄越
張之萬仍當嚴飭張曜等迅將張總愚股匪殄滅俾得騰出兵力
分路嚴防該逆既有欲出荆子關由鄂豫等省直竄金陵之說不
可不豫爲防範著僧格林沁曾國藩不動聲色將皖豫地方隘口
密爲布置以備不虞李雲麟另片奏請將派往受降中途遇害之

營弁議卹等語據稱逆黨蕭克成率眾千餘投誠李雲麟派劉連陞等前往受降何以行至中途猝有另股逆匪蠡擁而至蕭克成曾否被殺此股逆匪是否卽係蕭克成豫先埋伏李雲麟等爲其所紿著卽詳晰聲明據實具奏將此由六百里諭知僧格林沁官文曾國藩多隆阿嚴樹森張之萬劉蓉李雲麟並傳諭張集馨知之○諭熙麟奏甯夏滿城被圍緊急見籌救援情形一摺據稱甯夏滿城被圍日久待援孔殷該逆馬化澂攻陷州郡以後甯夏迤北賊巢徧地並據慶昫咨稱恩麟已派代辦甘肅提督梁生嶽馳往救援行抵中衛縣境被回匪阻隔不能前進所帶兵勇僅止千餘賊氛逼近縣城萬分喫緊各等語雷正綰一軍爲涇州及平固一帶之賊所阻一時未能北顧訥欽見已由榆林一帶馳赴甯夏仍恐兵力尙單副將趙廷烺旣據熙麟奏稱布置定邊防守深合

機宜卽著飭令趙延烺酌帶官兵五百名勇丁三千名救援甯夏
統歸訥欽調遣甯夏情形既如此之緊訥欽務當督率各軍刻卽
探路兼程遄進救援甯夏滿城不得稍涉延緩趙延烺一軍可否
爲嚮導之處著訥欽酌度辦理馬化澂屢撲中衛均經梁生嶽帶
兵擊退並著訥欽酌量情形儘能出其不意以成夾擊之勢更資
得手沈桂芬於地丁項下撥銀一萬兩委員取道草邊小路徑解
甯夏此路能否行走無礙著沈桂芬與熙麟妥籌辦理見在各路
大兵剋期赴援足資攻剿慶昫務當固守待援毋稍疏懈將此由
六百里各諭令知之○以桂清爲內閣學士由詹事遷○辛卯左宗棠
奏正月初三日花旗賊匪由廣德甯國竄入昌化縣之白牛橋副
將劉明珍率所部前往迎剿將該逆前隊花旗賊百餘殲之跟追
十餘里忽紅旗等股突至劉明珍輕敵前進官兵多有傷亡初六

日賊散屯昌化縣西北一帶山中蹤迹偏向西路臣知其將犯淳遂當飭提督黃少春由餘杭率馬步八營赴嚴州以出淳安溫處道魏喻義率所部三營由新城回守嚴州知府喻德成等兩營守金華副將戴奉聘等三營守衢州檄調副將王開琳等率所部老湘全軍由屯溪下趨淳安與黃少春一軍夾擊並調水師新右營師船赴淳助剿黃少春初九日馳抵嚴州該逆已一股到徽州績溪一股向淳安而竄其竄淳安界者經副將唐連勝率所部師船堵截斃賊多名而賊之前隊已於十一十二等日由歙縣之深渡地方擄民船宵濟先是王開琳因賊已竄入績溪初七日率所部由屯溪赴徽會同皖南鎮總兵唐義訓馳赴臨溪截剿頗有斬獲賊卽宵遁潛由績溪山徑竄至遂安之昏口馬金街一帶王開琳卽折回屯溪繞從白濟嶺赴遂安截擊十五日該逆率眾來撲總

兵丁長勝等督隊痛擊立斃長髮悍賊千餘名賊敗竄昏口十七日王開琳率各營將昏口各館踞逆剿洗殆盡其由遂安鮑村向馬金街而竄者官軍從後蹙之羣賊自相踐踏殺斃無算連破賊館四處斃賊數百忽大股賊匪復由郭村蠶擁而來黃少春等率所部四面兜剿偪賊入郭村盡殲之十八日該逆後隊仍由遂安之章村將竄昏口路過新橋黃少春督各營截之斃長髮賊近千名生擒二百餘名王開琳復率所部繞出昏口截殺又斃賊三四百名餘賊由昏口馬金街逸出竄往開化華埠據生擒賊供首逆李侍賢由溧陽竄過廣德甯國分股一竄安徽之績溪一竄浙江之昌化由昌化竄淳遂者爲僞王宗李荃受等前隊爲林政揚所帶廣東花旗賊及僞沛王譚星所帶廣東賊李侍賢尙在後未到也其績溪一股亦繞從深渡過河與此股合併此次官軍所剿者

爲廣東花旗股匪之後隊譚星李芒受之前隊其林政揚一股已竄開化華埠等語探聞遂安敗匪與此股花旗賊匪復由華埠繞江西玉山德興邊界竄至河口欲候大隊齊至再竄撫建李逆侍賢聞其行至昌化復行折回又聞尙在績溪地方臣一面飛咨江西撫臣一面飭黃少春由馬金街華埠追剿並飭王開琳嚴扼滬遂以防後股續至之賊見在沈葆楨於廣信玉山廣豐等處均已密布防兵賊之前隊雖竄江西大局或可無礙又奏侍逆李侍賢一股上年冬間由溧陽廣德分股竄至溇安績溪一帶其前隊廣東花旗股匪已竄入江境江皖浙三省交界之區戰事方殷必應處處嚴防杜其竄越查福建之崇安浦城光澤等處皆與江浙毗連防務亦關緊要福建臬司張運蘭前在皖南帶勇未經赴任上年兩廣督臣毛鴻賓於該員假歸時奏調赴粵可否請旨飭下兩

廣督臣速飭張運蘭卽赴福建臬司本任並將所部勇丁挑選二
三千名一併馳帶赴閩以資得力又署浙江臬司劉典回籍後接
其來稟以浙江軍務方殷擬於本年春間募親事畢迅速回營臣
已札飭卽在湖南本籍募勇丁三千配齊軍械由江西赴浙並令
路過江西時察探情形如須就近助剿卽稟明江西撫臣相機辦
理以期速爲蕺事又奏海甯州城收復後桐鄉與海甯相隔僅三
十餘里爲杭州通嘉興要路必先下此城始可分取嘉興石門等
處蔣益澧於正月初二日飭蔡元吉率八營乘夜襲取桐鄉縣城
守逆僞朝將何培漳開礮拒傷蔡元吉勇丁百餘人初三日蔡元
吉卽率所部分紮西南兩門蔣益澧復飭已革道員張景渠等馳
往桐鄉分紮東北兩門何培漳見官軍雲集勢甚窮蹙迺遣人通
款於鄒司張其光初六日子身赴張景渠營中乞降願率眾卽日

薙髮獻城並呈繳軍械等件蔣益澧以何培漳情詞尙無詐僞自可准其投誠以省兵力初八日官軍齊隊入城何培漳率眾迎伏道左其被脅夥黨除資遣回籍外蔣益澧挑其精壯列爲章字六營仍交何培漳管帶責令立功贖罪何培漳因烏鎮雙橋爲由杭入嘉要道願率所部前往駐守嗣杭賊之赴嘉取糧者路經雙橋被何培漳所部擊走之查何培漳雖爲賊中巨欸然獻城就撫不致重煩兵力自應寬其既往以廣 皇仁俟續有勞績再請給予獎敘又奏蔣益澧收復桐鄉縣城後卽飭署杭州府知府陳思矯會同副將葉炳忠及蔡元吉各營進規嘉興以與蘇師聯絡浙師駐城之西南蘇師駐城之東北正月二十一等日湖州悍賊二萬餘分撲烏鎮雙橋營壘杭州亦出賊萬餘逼近桐鄉焚掠冀解嘉郡之圍經蔣益澧督飭各軍擊退二十四日嘉興城外東北

賊壘數座經蘇師攻克西面賊壘數座經蔡元吉攻克城賊之勢愈蹙其杭州城外官軍偵知賊援嘉興於二十五日乘勢將望江門外賊壘三座攻克斃賊千餘直逼城根城上礮石如雨官軍仰攻數時始行收隊臣維嘉興一城米糧充足杭州餘杭之賊俱仰給於此自何培漳扼紫烏鎮雙橋杭嘉之氣中斷賊謀益沮見在蔣益澧飭副將劉樹元亦進紫烏鎮局勢可期穩固蔣益澧已於二十八日回畱下老營臣當督飭各軍相機攻取 上諭議政王軍機大臣等昨因曾國藩奏侍逆率黨歸併湖州由安吉孝豐昌化遂安以竄江西當經諭令左宗棠添調兵勇分投遏截著該督仍遵昨日諭旨檄飭派出各軍將後股賊匪實力截剿毋令接續上竄江境逞其撲犯撫建之謀至侍逆是否行至昌化又復折回抑尙在績溪地方著偵探明確分飭各軍奮力追擒以除巨慝蔣

益澧一軍收復桐鄉縣城後連克嘉興城外賊壘分軍駐紮嘉城西南與李鴻章之軍會同夾擊是杭嘉之賊勢已斷著督飭該藩司等迅圖攻拔嘉城以孤杭賊之勢花旗股匪前已竄入江境雖經沈葆楨派令韓進春等在玉山一帶堵遏尙慮兵力單薄且該匪見又竄及鉛山湖坊地方駸駸漸入腹地必得一枝勁旅前赴撫建遏截方可力挫兇鋒臬司劉典既經左宗棠飭其在湖南本籍募勇赴浙卽著飭令迅速督勇啟程卽於路過江西時察探賊蹤迎頭勦擊以保完善而維大局所請飭令張運蘭帶勇赴任一節本日已寄諭毛鴻賓催令啟程桐鄉降將何培漳仍令帶所部駐紮烏鎮雙橋是否可靠仍著該督隨時加意察看將此由六百里各諭令知之○諭官文等奏官軍克復廬山立解棗陽霸山之圍並鄖軍收復上津堡一摺皖逆闖入鄂疆在隨棗一帶肆擾此

次官軍被圍至六晝夜之久幸各將士堅守苦戰援軍奮勇馳救
立解重圍軍氣復振勦辦甚屬出力著官文嚴樹森激勵各軍乘
勝窮追務將此股悉數殄除肅清邊境上津堡雖經克復而藍二
順首惡尙在稽誅漢南大股髮逆悉數東下張總愚巨股又有自
南魯逸出偪近南陽之說敗捻已越棗陽若再上窺樊襄或直走
新鄧勢將不可收拾官文等見飭成大吉等水陸各軍分駐襄鄖
互相聯絡其荆門荆宜一帶又飭周鳳山六營居中控扼所籌均
尙周密卽著飭令在防將士嚴密堵剿聚殲醜類不得稍有疏虞
張總愚一股前據僧格林沁等奏飭蘇克金等誘令出險鈔擊此
時該逆旣已出山卽可用馬隊衝突著該大臣嚴飭蘇克金等迎
頭截擊痛加剿洗張之萬嚴飭張曜等軍會合夾攻總期一鼓殲
滅毋任旁竄分趨又成滋蔓楚豫軍情萬分喫緊張之萬務當振

刷精神督率各軍會合楚師認真防剿以保疆圉將此由六百里
各諭令知之○諭毛鴻賓奏接奉寄諭謹將前後擬辦情形縷晰
密陳一摺所籌不爲無見已照該督所請另降諭旨著卽妥爲宣
示密籌辦法以弭後患另摺奏官軍追剿陽春客匪連戰大捷卓
興已帶隊進抵陽春縣屬古良水口等情著卽責令該副將乘勝
進攻一律掃蕩蔣朝剛侯勉忠兩軍併歸該副將節制調遣方可
事權歸一俟此股辦有頭緒卽將戴梓潰等股匪拔除淨盡其老
弱良善不敢抗拒官文卽飭地方文武各員妥爲安撫以收一勞
永逸之效本日據左宗棠奏侍逆李侍賢一股由溧陽廣德分股
竄至溇安績溪一帶其前隊廣東花旗股匪已竄入江境福建之
崇安浦城光澤等處皆與江浙毗連防務亦關緊要請令福建臬
司張運蘭赴任等語廣東信宜克復逆首伏法地方漸就肅清而

福建界連江浙見在髮逆分股上竄必須有得力大員督防方能保全完善著毛鴻賓傳知張運蘭卽赴福建臬司本任並將所部勇丁挑選二三千名一併帶赴閩省以資得力將此由六百里密諭知之○予浙江殉難在籍道員俞焜建祠○壬辰河南巡撫張之萬等奏汝軍攻克息縣光州賊寨得旨息縣東南一帶賊巢仍著嚴督將弁乘勝迅速掃蕩勿畱餘孽又奏籌防漢中竄逆先期派兵扼守荆子關等情批昨據官文等奏張總愚自南魯逸出逼近南陽已寄諭該督嚴飭張曜等會合剿洗該撫擬卽移營魯山著仍遵昨日寄諭將此股捻匪剋期殄滅一面騰出兵力確探髮逆所向迎頭截剿毋令闖入邊境○予河南陣亡參領胡爾東阿等祭葬世職○甲午沈葆楨奏逆匪第一股由大南橋竄至廣豐其尾隊之在玉山者經副將顧雲彩等分途追襲擒斬甚夥其被

席寶田痛勦之第二股復由德興之分水嶺竄入玉山韓進春顧雲彩督軍於正月二十三日由錦雞嶺斜趨其後奮力擊勦賊遂大潰我軍追殺十餘里日暮收隊斬僞王宗李侍洸各巨逆殺悍賊二千餘人二十四五等日韓進春顧雲彩各派隊追勦該逆時聚時散被我軍截爲兩段一傍江山境一傍上饒境乘夜竄廣豐與第一股合是時開遂一帶紛傳李侍賢等股由績溪潛安跟蹤至婺源玉山各營皆以大警踵至未便窮追敗匪遂趨廣豐上繞鉛山弋陽貴溪之南鄉蔓延二三百里二十六日道員張岳齡及廣豐縣知縣王恩溥敗賊於廣豐之黃茅嶺二月初三日廣信府知府鍾世楨敗賊於鉛山之安洲渡初六日參將劉勝祥督勇隊復大敗賊於貴溪之馬鞍山俘級千計該逆乃遁而西其頭隊至金谿之蕭公廟爲撫建適中之地並擾至東鄉界上臬司劉于濤

護南贛鎮總兵普承忠先後到撫守備頗固建昌僅有兵勇千人該逆必避撫窺建臣飭守備楊錦斌以衛民軍赴撫建協守幸左宗棠所派黃少春王開琳兩軍已抵瀘遂累戰獲勝該逆後股扼不得渡曾國藩所派毛有銘一軍亦抵休甯守徽之總兵唐義訓續獲勝仗席寶田知前路稍鬆馳援安仁貴溪韓進春繼之再得數次勝仗大局可以無虞惟探聞賊知大兵緊追其前隊已由瀘溪小路翻山潛入閩境臣謬膺疆寄不能保全本境復將貽患鄰封調度乖方咎無可諉應請旨將臣交部嚴加議處 上諭議政王軍機大臣等髮逆闖入腹地該撫見派劉于濤等軍到撫楊錦斌率衛民軍赴建郡協守撫建兩郡諒可無虞惟該匪已深入腹地狼奔豕突蹂躪實多著沈葆楨卽飭派出各軍實力勦辦務期地方殲除勿任蔓延爲患劉典曾否由湘啟程著惲世臨催令迅

將勇丁募齊由江西赴浙一路察探賊蹤迎頭截擊左宗棠仍遵前旨飛飭該臬司趕緊赴援以資得力道員王文瑞請假回籍已經數月見在江浙軍務均屬喫緊著左宗棠沈葆楨檄調回營並著惲世臨催令迅速前進毋任逗留後股賊匪經黃少春王開琳兩軍扼之於清遂之交累戰皆勝賊不得渡左宗棠仍當激勵各將弁認真截擊不得任令上竄與全股合夥致辦理又形棘手竄江逆股知大兵緊蹙其後已由瀘溪小路翻山潛入閩地光澤邵武俱形喫重頃據徐宗幹奏臺灣南北兩路肅清各軍按剿餘孽將次竣事著左宗棠徐宗幹卽將臺灣撤回得勝兵勇派赴邵武一帶扼要設防如有匪蹤闖入卽行擊剿並飛飭該府縣文武員弁晝夜嚴防不得稍有疏失臺屬匪首林晟等見尙在逃並著該撫飭令在事文武嚴密搜捕勿任漏網此股逆匪希圖羣掣蘇浙

官軍後路奔竄靡定恐其被剿窮蹙或南竄粵東西擾湖南毛鴻賓惴世臨並當豫爲防範以保完善唐義訓見守徽郡毛有銘亦抵休甯著曾國藩飭令該員等嚴扼要隘勿令續來匪股得以肆行擾竄江忠義舊部見紮何處未據沈葆楨奏及楊岳斌能否統帶水師前赴江境並令兼帶江忠義所部勇丁以資督率之處著曾國藩迅速籌商並隨時與沈葆楨會商辦理以保東南大局沈葆楨自請交部嚴議之處著加恩寬免將此由六百里各諭令知之○以福建臺灣南北兩路肅清賞護提督曾元福巴圖魯名號道員丁曰健二品頂帶○戊戌子甘肅甯夏殉難道員侯雲登祭葬世職加等○庚子諭議政王軍機大臣等張之萬奏進剿李青店踞逆獲勝該匪翻山夜遁見在探蹤截擊一摺張總愚股匪會合李青店逆黨窮蹙紛竄張曜等親當其衝未能力加遏截致令

賊蹤橫逸實堪痛恨見在陝西漢中髮逆日夜銳意東趨已擾及內鄉境內陳大濬捻股欲向樊城老河口逸出黨任其乘勢勾結賊氛愈形蔓延防剿更難分布著張之萬嚴飭張曜郭承霖吳再升等軍星速繞出賊前會合夾擊並飭宋慶等軍馳赴嵩縣與張曜等前截後追痛加剿洗務將張總愚股匪悉數就地殲除儻再任令遠颺或致與髮逆另股勾合復行滋蔓必重治張曜之罪聞近來張曜大不如前遇賊不肯奮勇接仗勿謂朝廷一無聞見也其陳大濬一股並著官文嚴樹森張之萬督飭楚豫邊防各軍嚴密扼截毋令逸出竄合爲患蘇克金一軍赴豫助剿張逆股匪屢據聲稱俟偪賊出險卽行馳擊此次該逆拌死出竄蘇克金馬隊何以並未躡追實出情理之外見在陝中髮逆日偪豫邊經張之萬商令蘇克金傅振邦由南陽進兵嚴防內鄉之西峽口卽著僧

格林沁嚴飭蘇克金等迅速進剿如再遷延貽誤卽行嚴參懲辦
僧格林沁久未見有奏報曾否拔隊啟程何時可以前往豫省著
卽迅速具奏楚省卽西一帶邊防並著官文嚴樹森飭令派出之
梁作楫等軍與豫省官軍聯絡防範張之萬仍當督飭李殿元一
軍嚴防荊子關要隘毋令髮逆闖入豫疆如兵力尙單卽著酌量
添派以資扼剿毋得稍涉大意致有疏虞將此由六百里各諭令
知之○諭張集馨奏甯陝道路已通城防弛嚴境內肅清一摺漢
中髮逆竄撲甯陝廳城自正月初八日至二十六日賊眾盤踞城
外附近一帶窺伺城垣均經該廳文武督兵集團屢次擊退此股
係羅逆及僞扶陳逆不下十餘萬賊僞端藍逆斷後其僞啟增諸
逆黨約二三萬人均於二十六日夜間由賈家營梁家堡分竄鎮
安縣孝義廳各境又西鄉另股馬逆二萬餘人於二月初一日由

石泉銀杏壩竄關口亦由賈家營東竄甯陝廳境已無賊蹤由子午谷直至省門一律安靜該廳文武紳團相持一月之久卒能擊退大股逆匪尙屬出力著劉蓉迅卽查明奏請獎敘此股逆匪志在回援金陵日夜東竄亟須力籌堵截以遏逆氛劉蓉督兵追擊見在行抵何處李雲麟扼紮石泉何以任令馬逆一股竄向關口由賈家營東去未見奏報見在進剿情形究竟如何著卽迅速馳奏並著繞赴賊前奮力堵截毋得有名無實徒託空言自干咎戾本日據張之萬奏稱髮逆逼近荆子關經總兵李殿元堵剿斃賊多名又探稱髮逆欲從內鄉竄合張總愚股匪見已擾及內鄉交界之石樓地方本日已諭僧格林沁嚴督蘇克金等軍實力堵截張之萬嚴防本境官文嚴樹森嚴扼襄樊以防陳大澂等股匪句合皖粵各逆前經疊諭劉蓉不分畛域盡力窮追著卽懷遵前

旨星夜東進會合李雲麟一軍緊躡賊蹤兩路夾擊毋稍鬆勁至賊蹤分竄靡定儻被楚豫各軍阻截難保不折回陝境以窺晉疆沈桂芬當督飭蒲津一帶在防文武加意嚴防以備不虞所有商雒潼關等處仍著多隆阿檄飭在防各軍嚴密扼守其子午谷及西安省防仍應加意備禦甯陝廳屬團眾張集馨不可遽令解散盤屋叢爾一城賊匪並不甚眾多隆阿圍攻日久迄未克復以致全局爲賊所牽多隆阿初膺簡命銳不可當近來何以頓兵縣城日久無功殊不可解著卽速行設法攻拔毋再遷延貽誤將此由六百里諭知多隆阿劉蓉沈桂芬李雲麟並傳諭張集馨知之○以明緒爲內閣學士仍畱伊犁參贊大臣任○是月展緩山西臨汾縣歉收舊欠額賦